

愚

齋

存

稿

愚齋存稿卷第四目錄

奏疏四

遵 旨體察九廣鐵路情形摺

招商試辦德律風片

預籌鐵路還款並保全枝路摺

盧漢鐵路北端接軌至馬家鋪片

恰克圖電線工竣摺

請開復何其坦原官片

覆陳經元善蹤跡摺

覆陳電局情形摺

密陳各公司局廠艱難情形片

遵

旨籌議增稅事宜並擬稅釐兼顧辦法摺

加稅辦法清單

加稅備問各節清單並附

稅釐互勘請俟覈辦時分析詳陳片

遵

旨會商開議加稅情形摺

密陳統計餉項得失並洋貨加稅抵撥洋款片

前往上海考查貨物時價情形片

愚齋存稟卷第四

奏疏四

遵 旨體察九廣鐵路情形摺

光緒二十五年十月

奏爲遵

旨體察九龍至廣州鐵路情形恭摺覆陳仰祈

聖鑒事竊

臣於九月初十日承准軍機大臣字寄光緒

二十五年九月初十日奉

上諭鹿傳霖奏九龍至廣州鐵路修成以後如有事故  
英兵由香港頃刻可至險要俱失此路現經盛宣懷派  
員勘定尙待集款請及時罷修以杜後患等語九龍鐵

路關係粵防門戶現在集款未成洋商既不願出資能否設法停罷抑或宕延從緩著盛宣懷體察情形妥籌辦理原片著鈔給閱看將此諭令知之欽此伏查九龍至廣州鐵路係英國駐京使臣向總理衙門請准英商承修中國鐵路五條之一上年七月總理衙門准寶使函請復咨令<sub>臣</sub>處酌照中國南北鐵路章程與英商妥訂章程並照會寶使查照經<sub>臣</sub>與英商怡和洋行議定草約五條於本年二月十七日在上海鐵路總公司畫押卽經鈔約咨呈總理衙門在案竊維此案初由英使堅執請索本係交涉之事總理衙門鑒於俄法諸路之

前轍委之總公司變交涉爲商務權衡利害實具深心  
鹿傳霖謂由香港華商欲藉此集資漁利起意聳動似  
係指十年前華商有具稟粵督者尙未悉此次發端之  
所也自現在九龍地方已屬英國租地則由香港至九  
龍海道頃刻可至由九龍至廣州陸路亦咫尺相連不  
必待修鐵道而已可徑行直達揆諸各國經營外政此  
段鐵路彼必不能終止而我亦無以相拒現歸商辦雖  
英商借款代造究竟路爲中國之路猶可隨時羈馭較  
勝於彼國自造總理衙門行知議定之約欲令停罷不  
難於廢商辦之局特慮改歸交涉後患殆有甚焉英方

有事於南非洲其商人與國家同休戚無暇及此故不  
催定正約原片所稱洋商知其無利無人出資消息似  
未盡確但使彼不催辦總當擱置不提以免挑動他日  
如來議正約再當商請總理衙門相機因應以副  
朝廷廑念海疆之至意所有遵

旨體察九廣鐵路情形緣由謹繕摺覆陳伏乞

皇太后

皇上聖鑒謹

奏 本日奉

旨依議欽此

招商試辦德律風片

光緒二十五年十月

再德律風創自歐美於電報爲支流如江河之水支流之分洩多則正流之來源微是德律風本與電報相妨者也第新理日出人情喜便無智愚長幼之別無學習譯錄之難入手而能用著耳而得聲坐一室而可對百朋隔顏色而可親聲欬此亙古未有之便益故勦行未三十年徧於各國其始止達數十里現已可通數千里新機旣闢不可禁遏然使與電報各樹一幟則涓涓分派積久而可斷正流日本電報德律風統歸遞信省學生教於一堂機器出於一廠誠深知事權之不可分也



中國之有德律風也自英人設於上海租界始近年各處通商口岸洋人紛紛謀設吳淞漢口則請借桿挂線矣廈門則請自行設線矣電報公司竭力堅拒但恐各國使臣將赴總理衙門要求又滋口舌一經應允爲患甚鉅況西人耽耽逐逐欲攘我電報之權利而未得其間沿江沿海通商各埠若令皆設有德律風他日由短線而達長路由傳聲而兼傳字勢必一縱而不可收拾不特中國電報權利必爲所奪而彼之消息更速於我制防不早補救何從現在官款恐難籌措臣與電報各商董再四熟籌惟有勸集華商資本自辦德律風與電

報相輔而行自通商各口岸次第開辦再其次及於各省會各郡縣庶可預杜彼族覬覦之謀保全電報已成之局如蒙

俞允當再勸諭電商招集股本一切事宜隨時咨請總理衙門察核妥爲籌辦謹附片具陳伏乞

聖鑒訓示謹

奏 本日奉

旨依議欽此

預籌鐵路還款並保全枝路摺

光緒二十五年十月

奏爲預籌盧漢鐵路還款亟應保全枝路以收路利而  
備歸本恭摺仰祈

聖鑒事竊查盧漢鐵路係貸借比國公司四百五十萬  
鎊合同載明九扣五釐息三十年限期十年之內付利  
不還本第十一年起卽須帶利還本至第三十年全數  
歸清原奏已深慮盧漢之車利不足歸還鉅款然猶冀  
南北通衢止此一道或不致全無把握乃有粵人容闓  
到京創爲津鎮鐵路之說湖廣督臣張之洞兩江督臣

劉坤一直隸督

臣

王文韶先後電奏阻止無如德使海

靖英使竇納樂赴總理衙門竭力要索遂與訂立合同於是盧漢幹路之外又有津鎮幹路試思中國祇此財力南北祇此貨客兩路並肩利散而薄在德使但欲就山東接通直隸江蘇在英使但欲就江蘇接通山東直隸各佔其權利之所在絕不顧中國將來如何還債也似此盧漢直路應得之利已失一半矣然猶冀枝路稍可補救乃俄國銀行已准從正定之柳林鋪另造至太原省英國福公司又欲從澤州懷慶之間另造至衛輝並欲直造至襄陽或浦口似此盧漢橫路應得之利又將全失矣以目前而論總公司多一事誠不如少一事

以將來而言失其利又安能歸其本總理各國事務衙門統轄路礦總局會奏內開各公司所辦各路其大宗皆係息借洋款所立合同皆載有本息未還以前將所辦之路作爲抵押設榦枝雜揉競辦當彼此尙未貫通之際縱有路利必難豐旺所有應付洋債本息及養路各費恐無實在著落則抵押之路必難收回是權利仍屬他人操縱豈能由我商路之害亦

國家之害等語所見甚爲深遠大抵各國舉辦榦路其有益榦路之枝路必當先儘榦路公司自造如不願辦再任他人另舉不當如今日之雜揉競辦也但以時局

而論可不辦者總局自當嚴加厲禁而必應辦者總公  
司尙宜收歸自辦庶幾利不外散而本可圖歸茲查盧  
漢幹路南岸係在滎澤過河查滎澤縣東至開封府約  
計一百七十里西至河南府約計二百五十里又鄆城  
東南至周家口約計一百二十里路甚平坦鋪軌極易  
自汴以達齊魯自洛以通秦隴自周家口以達淮河南  
務來源極遠應請歸入總公司盧漢幹路籌款接造以  
免各國覬覦促我生機此係近幹短枝要路本不在停  
辦之列況屬由幹生枝不致紛歧橫擾如蒙

俞允臣當與總理衙門路礦總局妥商卽令比商籌款

勘估一氣趨造約計幹路造抵黃河之日卽爲枝路接  
通汴洛之期不僅收利歸本有益實於大局亦有關係  
是否有當伏候

皇太后

皇上聖鑒訓示謹

奏 本日奉

硃批著照所請該衙門知道欽此

盧漢鐵路北端接軌至馬家鋪片

光緒二十五年十月

再津盧鐵路盧漢鐵路開辦之初均係

奏明以盧溝橋爲起點嗣因天津一路僅至盧溝橋距  
京稍遠於客貨起卸不便卽由督辦津盧鐵路大臣胡  
燏棻續奏直造至永定門外馬家鋪爲止距城門僅有  
五里中外官商俱各稱便而盧漢路更綿長將來尤須  
與粵漢路滬甯浦信各路相接客貨雲集實爲中國商  
務第一樞紐若仍照原案以盧溝橋爲限止如目前盧  
保行車暫租津盧所管之豐台軌路十里保定來往搭  
客均在豐台聽候京津輪車經過之時方能換車前進



官商甚以爲苦嗣後展路愈長貨客愈多不勝其煩就使暫作通融將來亦必各顧利益諸多隔閼訪之各國幹路亦斷無在曠野之地截止起卸辦法况京津路係歸英國人代管卽如現議租借豐台軌路一節亦尙未能安定查盧漢及粵漢各路借款甚鉅若使行車阻滯則歸還洋債更無把握臣責有攸歸不得不通籌濟益擬請援照津盧鐵路亦由盧溝橋接軌至永定門外馬家鋪止庶使盧漢往來搭客載貨與津盧一律不分軒輊如蒙

俞允

臣

當與總理衙門路礦總局妥商所需購地鋪軌

之款約計數十萬兩卽在總公司所領部款一千萬兩之內籌撥作爲總公司自辦之鐵路毋庸另借洋款不在抵押比款之內亦毋庸交與比人管理以昭慎重是  
否有當伏乞

聖鑒訓示謹

奏 本日奉

硃批著照所請該衙門知道欽此

恰克圖電線工竣摺

光緒二十五年十二月

奏爲籌辦恰克圖電報工竣恭摺仰祈

聖鑒事竊前經總理衙門奏明由臣集款籌辦恰克圖

電報與俄線相接當於光緒二十三年四月間委派直隸候補直隸州知州王繼善先由京城造至張家口又於九月間續派分省補用道余思詒前營口同知陳忠偉由庫倫造至恰克圖旋以糜費過鉅改派已革在任卽選道江西餘干縣知縣何其坦接辦於本年二月二十六日奉

硃批該衙門知道欽此遵卽飭令該員帶同洋匠工役

尅期馳往於四月初一日由張家口開工十月初八日  
造至庫倫一律告竣據該員稟報並由庫倫辦事大臣  
咨照前來臣查此路電報經俄國使臣疊次催辦約定  
年限本係不可再緩之工余思詒陳忠偉等辦理庫倫  
恰克圖一段僅止五百餘里已用之款至十七萬兩有  
奇猶復請添鉅款合計所需多至二十餘萬屢經駁查  
尙未結案至由張家口抵庫倫一千八百五十里逾  
三倍一片沙漠絕無人煙採運工作視庫倫恰克圖一  
段尤爲棘手前事者方以辦理不善撤退接手實難其  
人深慮藏事逾期失信鄰國經臣詳加遴訪據各局董

公舉何其坦接辦臣與先事詳議申明約束程期不得逾九十月工項不得過八萬兩並由商號包運電桿每根銀八兩至八兩五錢電線材料每百觔銀五兩至五兩五錢期於以省補費以速補遲該員力任艱鉅竟能於五閱月之內成幾及二千里之工時日既不稽延用費又極撙節於邊防交涉要工得力實非淺鮮臣前經奏明工竣後查明時日用費工程三者均能符合程度當懇

恩分別給獎現已如期竣事洵屬著有微勞除何其坦一員由臣另片奏請外所有在事出力各員擬由臣查

照成案擇尤請獎以示鼓勵張家口至恰克圖地段縣長人煙稀少桿線如有損壞修理倍形煩難前經奏請撥派蒙旗弁兵按段巡護仍由電局酌給津貼近據各該委員稟稱沿途屢有偷竊桿線之事亟應嚴拿懲辦以儆效尤應請

飭下綏遠城將軍烏里雅蘇台將軍察哈爾都統庫倫辦事大臣轉飭各蒙旗派出弁兵一體加意巡防遇有竊毀桿線案件卽行按照專條治罪以重要工而免延誤除分咨查照外理合繕摺具陳伏乞

皇太后

皇上聖鑒謹

奏 本日奉

旨依議欽此

請開復何其坦原官片

光緒二十五年十二月

再已革花翎在任卽選道江西餘干縣知縣何其坦經臣奏明派辦張家口至庫倫電工該員受事於積弊之後力任其難所辦工程較余思詒等庫倫恰克圖一段長逾三倍之多而用款不過八萬兩相形懸絕邊外砂磧艱苦辦工本較內地爲難非有過人之才不能事事精覈動輒虛糜鉅款甚或借端侵蝕以爲不能以常格相繩不以爲利藪卽視爲畏途每遇用人之時常有乏才之歎若何其坦之才任艱鉅又能潔已奉公洵屬爲守兼優不可多得當此需才方殷棄置實爲可惜伏查



光緒十六年二月前署雲貴督臣譚鈞培以降調道員李必昌總辦滇邊電工最爲出力奏請開復原官銜翎並免繳捐復銀兩奉

旨允准今何其坦事同一律而工程之鉅辦理之難用費之省尤爲過之合無籲懇

天恩俯准將已革花翎在任卽選道江西餘干縣知縣何其坦開復原官升階翎支並免繳捐復銀兩以示鼓勵抑或先行送部引

見聽候

錄用出自逾格

恩施臣爲人才難得起見是否有當謹附片陳請伏乞

聖鑒訓示謹

奏 本日奉

旨何其坦著准其開復原官欽此

覆陳經元善蹤跡摺

光緒二十六年正月

奏爲據實覆陳恭摺仰祈

聖鑒事竊

臣

承准軍機大臣字寄正月初九日奉

上諭有人奏電局委員聚眾妄爲危詞挾制督辦通同一氣縱令潛逃請嚴旨勒交以伸國憲一摺上年十二月二十四日特頒硃諭爲

穆宗毅皇帝立嗣薄海臣民同深慶幸乃有上海電報局總辦委員候補知府經元善膽敢糾眾千餘人電致總理各國事務衙門危詞要挾論其居心與叛逆何異正在查拏間聞經元善卽於二十八日挈眷潛逃難保

非有人暗通消息使遠遁盛宣懷督辦各省電報受國厚恩經元善爲盛宣懷多年任用之人自必熟其蹤迹著勒限一個月將經元善交出治罪以伸國憲而靖人心儻不認真查拏一任畏罪遠颺定惟盛宣懷是問原摺著抄給閱看將此諭令知之欽此伏讀之下惶悚莫名

臣

於上年十二月二十八日接據上海電報分局

委員降調道員王松森候選州同陳寶源電稱局員經元善家人稟報該員現患瘋顛之病一時難以醫痊擬卽伴送回籍就醫轉請派員接替二十九日據上海電報總局提調知府楊廷杲電稱經元善於是晚潛赴吳

淞聞將覓搭公司輪船前赴港澳並據經手員司查出  
該員虧挪公款三萬七千餘元臣聞信之下不勝詫異  
卽馳電飭令楊廷果等設法阻止嚴追款項並函告總  
理衙門速電上海道派員看管三十日卽接楊廷果等  
電稱經元善已上法公司船阻止不及查該船係赴香  
港臣卽電告署兩廣督臣李鴻章派員赴港誘獲押送  
赴滬旋接李鴻章電稱港係洋界無從誘獲等語臣查  
經元善身係職官膽敢糾眾造言生事實屬罪無可道  
乃於未經奉文查拏之前先行挪盜公款潛謀逃遁誠  
如

聖諭難保非有人暗通消息原奏謂臣通同一氣臣於

接該局來電之始卽電飭楊廷果等設法阻止並告知

總理衙門電飭上海道派員看管又電知兩廣督臣派

員誘獲臣若縱令經元善遠遁何必分電滬粵設法緝

拏又何肯以局中鉅款任令席捲而去此事本末原委

自在

聖明洞鑒之中至經元善之爲上海電報分局總辦本

係李鴻章於光緒七年在北洋大臣任內委派迄今垂

二十年局務尙無貽誤不意一旦喪心病狂竟至於此

臣督辦該局未能先事防範實屬咎無可辭現旣欽奉

諭旨飭

臣

認真查拏

臣

業經電飭沿海各省電報局員

嚴密購查稍有蹤迹卽隨時通知地方官實力緝拏以期必獲惟經元善如果潛匿香港該處係屬洋界恐求之愈急匿之愈深急切未能弋獲應請

旨將該員先行革職並

飭下兩廣督

臣

一面設法嚴密購拏經元善籍隸浙江

上虞縣併請

飭令浙江撫

臣

轉飭地方官密查該革員如潛逃回籍

卽行拏辦總期不至漏網庶足以伸

國憲而示懲儆理合先行據實覆陳伏乞

愚齋存稿

卷四 奏議四

七

皇太后

皇上聖鑒謹

奏 本月十二日奉

硃批另有旨欽此

光緒二十六年正月十二日奉

諭旨盛宣懷奏覆陳經元善蹤跡一摺本日已有旨將該員革職並令劉樹堂查抄該革員家產仍責成盛宣懷設法購拏毋任遠颺致干重咎至該革員虧挪公款三萬七千餘元卽著如數追繳欽此



覆陳電局情形摺

光緒二十六年二月

奏爲據實覆陳仰祈

聖鑒事竊

臣承准軍機大臣字寄正月二十五日奉

上諭有人奏電局利權太重請遴員接管一摺中國電報創設有年雖商股居多而開辦之始亦曾借撥官款近年分局日增獲利應更厚盛宣懷當茲重任自宜綜覈分明俾利源所在人人共知免滋疑議著將每年所得報資若干開支若干商股利息若干實在餘存若干開具清摺將款目和盤托出按年奏銷一次並將官報嚴定章程總以不收報費爲實心報効庶足杜人口實

原摺著抄給閱看將此諭令知之欽此跪誦之下感悚莫名伏念電報局開辦以來所有從前之歷盡艱難將來之尙待推廣一切詳細情節臣於二十五年七月間曾經據實瀝陳將歷年收支盈餘數目開具清單恭呈御覽此後自應謹遵

諭旨按年奏報一次以昭大信而釋羣疑竊維電局本係集華商合眾之力以與洋商爭衡旁觀每驚爲大利所叢其實析分千百股商仍皆寸寸銖銖之微利近年電線開拓日廣則局用及修線養線之費亦日增上年因中俄條約接造恰克圖之線用費六十餘萬兩未請

官款悉係電商集資辦成沙漠荒僻之區絕少報費而常年用數尤鉅至本年應辦之工因辦理鐵路盧溝橋至保定線已造成又須造保定至漢口幹線因辦理海防則須造甯波至溫州之線總理衙門因洋人之請則須造山東泰安沂州之線此外各路加線要工絡繹不絕官款並無可籌皆借股商之力以赴公家之急上年六月間協辦大學士臣剛毅在江南查辦事件曾將局中歷年收支帳冊逐一澈查奏明該局公積盈餘均經用以擴充電線經費尙覺不敷而利益收回不少於近年認捐南北洋學堂公費銀五萬四千兩外酌定每年

再報効銀四萬兩如遇餘利加多年分仍照二成加捐此外免其派捐所有實在情形久荷

聖明洞鑒總局收支各帳均係按年刊布各局詳細坐簿亦任股商隨時查閱一出一入眾見眾聞非如官中所辦報銷出於一二人之手者可比原奏所疑各節似屬不知此中原委至該局官報之費經前北洋大臣李鴻章酌擬一半報効一半給資期於官商兼顧持久不廢於十三年七月十五日奏奉

諭旨允准遵行至今當剛毅奏定報効數目之先直隸督臣裕祿卽有撥抵頭等報費之請臣飭各商董集議

僉稱向例頭等官報均係提前先發從前洋商因商報落後嘖有煩言若竟全不收費則將來官報愈多局內之虧折外人之詰責固屬勢所必至而緊要官報亦必因此夾雜延誤尤不可不防向來明發

上諭分遞各省均係全行報効至京外文武各官旁推交通爲數甚廣但憑一紙到局並不能辨其所言爲官爲私展轉代發均所不免是以各國商電局遞寄官報皆收全費並無報効惟英之屬國數處因其國家每年津貼甚鉅畧減報費然所減亦不及半

臣屢飭商董會議上下相維之辦法除酌收半資以示限制之外實無

從別定章程

臣

查此項報費以二十五年最近一年爲

衡總理衙門發電止有三萬六千七百餘元南洋大臣  
發電止有九千二百餘元北洋大臣發電止有二千六  
百餘元此中尙有代遞外洋各電其海線報價至貴卽  
在所領款內分給東北公司則華電局所得尤屬無幾  
並無原奏所稱取給部帑五萬兩之鉅較之眾商報効  
銀數尙不及十分之三在公家所費不多而商局賴以  
維持者甚大當此時艱款絀臣子具有天良卽如輪船  
漕運例准免稅二成臣查看商力尙可支持卽勸令各  
商董請將此例註銷每年所增稅項在十萬兩內外並

不待有人陳奏本年正月裕祿以北洋學堂頭等學生  
卒業應照原奏挑選出洋歷練精益求精擬每年選派  
八名仍照三年期滿章程籌撥經費咨商臣飭局酌籌  
一半臣維此項學生三年學成而歸量其材能派管路  
礦製造各局廠免爲洋人所持裨益甚宏但船局實已  
無可再籌已勸令電局各商認捐一半按年措繳苟爲  
商力所能及臣無不竭誠勸勉以匡要舉至官報收費  
一事權衡利害實未敢強以所難蓋商務受累太甚其  
害仍中於公家不能不審慎周詳以維大局又原奏所  
稱電局任用匪人舉余華柏經元善二員爲證查經元

善前經各督撫歷年派辦賑濟傳

旨嘉獎十餘次於創辦電報及織布局之始先係北洋大臣派作委員後由眾商舉爲董事乃忽喪心病狂至此臣在京師雖非意料所及固難辭失察之咎余華柏則係北洋官局所派之委員與商局截然兩事實非臣所能過問中國電報本係創設李鴻章因官辦一年虧折甚多又因交涉洋務諸多後慮旋即奏明商辦命臣招股推廣抵制臣於上年七月曾經附片密陳電局自與大東大北兩海線公司及俄法各國邊界電線定立合同中外界限未逾尺寸聞法國將由安南設海線至



廈門德國將由膠州設海線至大赤山將來抵制防範日難一日至於收支帳目向係責成鉅股商董皆守公司法度官爲督率名雖重而權則分畝商以臣爲首先興辦之人前則念艱難之共厯後則望推廣之日新故雖逐年餘利無多而報効鉅款趨辦要工但使力所能爲尙無缺望之意臣兼管之上海紡織總廠漢陽鐵廠萍鄉煤礦通商銀行所集商股卽是船電兩局之華商挹彼注茲盈虛酌劑鉤連一氣勉與支持成效未收方虞不繼人猶以爲利藪指摘頻仍殊不知集商民有限之資辦

國家有益之事均屬創格不得不破除情面力任勞怨  
故於尋常請託借貸均不能應他人責望日積月累遂  
爲眾謗之叢臣受

恩至深忝茲重任忍辱蒙詬義不敢辭惟利鈍未可預  
期日懼顛隳以爲

聖明知人之累如蒙

俯鑒微薄將

臣

所管之各局廠及時遴選妥員接管俾

臣稍釋負荷保全末路出自

天恩懷懷愚忱不勝至願理合繕摺覆陳伏乞

皇太后

皇上聖鑒謹

奏本日奉

旨知道了欽此

密陳各公司局廠艱難情形片

光緒二十六年二月

再泰西諸國於鍊鐵一廠視爲至重大之事用款動至千萬以上蓋造船造軌造槍造礮無往非鐵其國之強弱繫乎其中日本近亦大開鐵廠竭力經營中國物產之富雄視五洲而所用皆資洋鐵平時漏卮旣大更恐有事爲所挾持湖廣督臣張之洞有鑒於此於光緒十六年開辦鐵政局冀立自強之基費鉅工艱竭公帑數百萬逮二十二年官本不能接濟乃議改歸商辦當時奏稱洋股旣不可招集華商又視爲畏途以臣辦理招商局多年爲華商所信服請責令臣招商接辦恩恩奉

命不容諉辭伏念海內紳商殷富甚多而聞此皆裹足不前蓋旣非旦夕所能程功又非羣力不能支柱尤可懼者局外不知局中之苦事後不知事前之難眾論舐排成功卒鮮臣受事於危難之際重以

聖明委任不敢不力爲其難

臣

智薄能鮮全恃輪電兩

公司之華商諒

臣

二十餘年之苦心歷盡艱危一矢誠

信利則數千百人之所共毀則

臣

一人之所當深信不

疑慨然相助甫歷三載盧漢製軌之貝色麻鋼及製槍礮之馬丁鋼皆能自煉自造與外洋所購工力相埒惟因焦炭遠購開平價值奇昂商本賠折已逾百萬其危

殆情勢較之十餘年前之輪電兩局更有過之惟盼二  
三年間萍鄉煤礦炭鑪運道一律告成或可添集商本  
漸收利益而成敗利鈍尙難逆觀張之洞原奏目前數  
年內承辦商人必先墊不貲之鉅本乃可待鐵利之興  
是此時賠累情形早已上達

宸聰竊維東西洋各國無不竭力護持公司蓋非此不  
足以開自有之利源而杜利權之外溢中國通商以來  
祇輪船電線開平煤礦數公司辦理多年畧著成效使  
今日並此而無之則江海之上盡洋船水陸各路皆洋  
線輪船輪車各機器局廠皆洋煤矣又如紡織廠以奪

外洋運銷紗布之利通商銀行以流通中外遠近之財  
皆各國注意之要端猶惜籌辦太遲收效難速而煉鐵  
一廠尤爲關繫重大必須竭力維持鐵廠招集之股商  
卽輪電兩公司之股商惟恃兩公司之稍有盈餘以輔  
鐵廠之不足利害相依視爲命脈大約該鐵廠立腳未  
定之前無論何人接辦其勢皆能合而不能分此時緊  
要關鍵惟在保全兩公司庶鐵廠有轉圜之機而商務  
有振興之望當此情勢岌岌接濟一斷顛墜立形不特  
以前公款數百萬幾同虛擲尤慮各國洋人已在東豫  
晉蜀數省開辦煤鐵礦勢必設立洋廠以與華廠爭衡

華廠一蹶盡屬洋廠矣所關中外全局尤非淺鮮而局  
外不知此時兼辦鐵廠之危難猶指爲利權之所屬臣  
不敢不將此中原委詳細縷陳仰冀

聖明垂察謹附片密陳伏乞

聖鑒謹

奏 本月十九日奉

旨知道了欽此



遵 旨籌議增稅事宜並擬稅釐兼顧辦法摺

光緒二

十六年二月 蘇藩司會奏

奏爲遵

旨籌議增稅事宜並酌擬稅釐兼顧辦法恭摺密陳仰  
祈

聖鑒事竊<sub>臣</sub>等於光緒二十五年十月十六日承准軍  
機大臣片交本日面奉

諭旨盛宣懷奏條陳籌餉事宜開單呈覽一摺據稱加  
稅一事與各國屢議未成查咸豐十年新定通商稅則  
善後條約第一款載明應核作時價照值百抽五例征

稅現在金貴銀賤但須扼定此一語將各口進出貨物  
稅則照時價另行核估自無所用其加稅現屆十年換  
約限期應及時迅與認真開議又近來外國煙酒藥料  
器皿等物中國銷路甚廣不盡各國官商自用應如何  
分別辦理之處請一併籌議等語各口關稅如照現在  
時價核估所增稅項實爲籌餉大宗著派盛宣懷董緝  
槩會同赫德查照條約迅速籌辦仍由總理各國事務  
衙門綜覈辦理欽此仰見

聖明在上俯采芻蕘伏讀之餘莫名欽感臣等當卽先  
與赫德疊次會商旋經赫德呈遞估價比較清冊並據

聲稱洋稅二千數百萬內有洋藥一項已經加稅船鈔  
一項無從另估又進出口貨冊內新增名目已照現時  
估價亦難再增出口貨皆係銀本絲稅則法國不願加  
增茶稅本屬太重必須議減方能暢銷止有原列稅則  
內金價所置之進口貨可照時價另行核估洋貨土貨  
緊長補短每年通扯增收之數必有加增其所增多寡  
以銷路爲衡殊難預定實數等語臣等竊以爲稅則十  
年一修尙須無事之秋方能照約籌議實屬機不可失  
現與赫德詳細妥籌必須稅釐兼顧乃爲有利無弊擬  
請照前奏先將進出口貨一面照時價核估扯平修改

長沙不遠  
名  
三  
一面專指洋貨按照洋藥稅釐併徵辦法於核估時價  
正稅值百抽五之後併連子口半稅二五統加釐金一  
倍共總值百抽十五俱在海關併徵則於籌餉大有裨  
益伏查洋藥稅釐併徵一案前出使大臣曾紀澤在英  
國往復籌商時閱數年始有成議開辦後洋藥進口漸  
減漏卮漸窄而海關併徵釐金每歲得以加增五百萬  
上下中飽偷漏之弊一掃而空俱歸實際此實中國通  
商以來最爲利益之事故臣等此次擬將進口洋貨援  
照辦理在洋藥不過進口貨之一端關涉亦僅在一國  
當時籌辦已如此之難茲則所議不止一項並須與各

國次第商量近來辦理交涉尤與從前情勢不同能否  
剋期就範尙無把握現值

國家需款孔亟但有可設法之處自應盡力籌維曾向  
洋商詳加討論其意總以各處釐金留難紛雜於彼貨  
銷場有礙若能將釐金定一確數與關稅一起併徵較  
爲畫一簡便冀貨可暢銷則雖多出稅銀可免需索拖  
延之累彼或尙可允從現議稅釐併徵係專指進口洋  
貨而言其土貨釐捐一切照舊並擬將出口土貨向半  
稅者改完釐金以抵洋貨釐捐改歸海關併徵之數是  
於各省釐金實無所損所有現擬辦理情形分別開呈

清單二件恭呈

御覽其中所擬辦法皆與赫德逐細考究據稱即可持此開議此後詳細條目仍隨時與總理各國事務衙門妥籌辦理理合繕摺密陳是否有當伏乞

皇太后

皇上聖鑒訓示謹

奏 本日奉

硃批另有旨欽此

光緒二十六年二月二十四日奉

上諭前據盛宣懷條陳請將各口進出貨物稅則照時

價另行覈估當經派令盛宣懷聶緝槩查照條約迅速  
籌辦茲據盛宣懷等奏遵旨籌議增稅事宜並酌擬稅  
釐兼顧辦法一摺現在金貴銀賤較之咸豐十年初定  
稅則之時不啻倍蓰又值十年修約之期實屬機不可  
失該京卿等於照時價另行覈估一節並未詳悉議及  
第籌議進口洋貨稅釐併徵併擬將出口土貨向完半  
稅者改完釐金以抵虧釐之數如與各省內地釐金毫  
無窒礙卽責成盛宣懷聶緝槩認定宗旨次第開議然  
亦必確有把握方可改章倘因此別滋漏弊轉致釐金  
大絀或統計所入得不償失事關餉項大局務當慎之

又慎設有貽誤恐該京卿等不能當此重咎也將此諭  
令知之欽此



謹將加稅辦法繕具清單恭呈

御覽

一洋貨進口稅 赫德已將進口貨物詳細查明按照現今估價立一比較清冊其中凡徵數在值百抽五以下者均應增足在值百抽五以上者亦應核減並將原定稅則不列之貨物均一體估價補入

謹按現在估價清冊擬議一律值百抽十五按照洋藥辦法作爲稅釐併徵向章洋貨進口每值百兩完納正稅五兩又運入內地完納子口半稅二兩五錢沿途釐金本已在內今議另加七兩五錢以專抵落地釐捐每

值百兩加倍併徵十五兩統在進口新關一起完納運入內地行銷概不重徵

查己亥年進口稅六百七十五萬赫德節畧內稱試將前呈貨物比較清單揀閱大約懸揣可增進口稅在三百萬以內又稱若能值百抽十五則進口併徵稅釐之總數必較從前多收鉅款一倍

一土貨出口稅 赫德已將出口貨物詳細查明按照現今估價立一比較清冊其中凡徵數在值百抽五以下者應否加增在值百抽五以上者應否核減此二層卽應預爲酌奪並將原定稅則不列之貨物均一體估

價補入

謹按現在估價清冊擬議值百抽五少則酌增多則酌減仍照向章出洋之土貨只納正稅五兩又半稅二兩五錢總共值百抽七五毋庸加收以顧華民生計向來洋商赴內地辦土貨領三聯單者完半稅不完釐無單者完釐不完半稅現擬給單赴內地悉令照半稅銀數全完釐金但准其赴出口海關呈驗已完釐捐之收據如比較半稅多完應由海關照數退還洋商並按結向釐局撥還海關無單者不得退還以杜行銷中國內地之貨有所影射

查出口貨以絲茶爲大宗絲稅約已值百抽五未便議  
加茶稅均在值百抽五之上應一律估價減至值百抽  
五雜貨可增之稅恐不敵此大宗查印度日本茶並無  
內地出口稅故銷路日盛華商因是虧累不堪若不減  
稅則茶必少銷稅亦日短若減稅則茶必多銷稅亦日  
增如能併徵辦成目前所短之茶稅自有所加之洋貨  
稅抵補況數年內茶多出口可望仍復減徵之數如減  
稅而無益於銷路屆時仍欲議加或可在出產內地隨  
便加捐無礙稅則

一土貨內地釐捐 各省土貨稅釐一概照舊徵收與

# 修改稅則新章不相干涉

謹按各省土貨未售與洋商之前本有出產內地捐自可仍舊徵收但不可多加於向來所收之數譬如茶葉方議減稅則內地捐暫不必加減須看後來銷路若何再行酌定其土貨已售與洋商之後現擬新章領單由內地運貨至海口仍可照常完釐但逢關納稅遇卡抽釐誠恐洋商不允或令於土貨起運第一釐局照應完半稅銀數一起完釐給予釐局印收所過關卡驗票放行洋商似無所藉口至於自此省運往彼省自行銷售之土貨仍一概照常沿途完釐惟洋貨既辦稅釐併徵

各省釐捐擬請名爲土貨釐捐局以分界限

一外國煙酒器皿等物如何分別辦理 赫德節畧內稱是欲將免稅之物改爲徵稅之物亦應於修改稅則時籌商方能照辦

謹按己亥年擬辦修約第九款云英商家用船用雜物從前條約本有載明完稅各件今再將該前項雜物由總稅務司分別開明附後以免牽混若運入內地售賣仍照舊章完納稅銀等語似可照此籌議或謂此項約畧懸揣亦可得稅銀一百萬之譜

謹將加稅備問各節繕具清單恭呈

御覽

或曰加稅誠有益於中國恐非各國所願前兩次與各國議而未成今時局更難豈有把握答曰加稅原非各國所願但期滿修改稅則係條約所載前議因專主鎊價故沙侯以金鎊本無定價駁復今照時值估價應增者增應減者減似有可允之理至稅釐併徵之法向聞洋商皆極稱釐捐留難不便若趁此各國無事修改稅則並議定併徵據赫德云洋商樂於直捷或允加重稅項

或曰洋貨加稅太重恐洋貨滯銷則稅亦有礙答曰華民已用慣洋貨購買均屬有力之家當不靳此現議土貨估價而不加稅卽如茶葉尙擬減稅則土貨必可暢銷洋商旣獲運銷我土貨之利必將土貨所辦資本購買洋貨至中國以省滙兌金銀之費斷不患滯銷於稅有礙

或曰釐金行之已久雖積弊難除近有議包辦釐捐者當可加增釐金豈不勝於加稅答曰包釐之法若不權歸紳商則辦不動若予以事權則同一擾累且恐廣東之外他省辦不動從前洋藥包捐其弊百出逮至稅釐



併徵所收之款數倍於包捐中飽之弊一空公家歲益數百萬此其明證

或曰關稅之權盡歸洋人一旦有事恐關稅盡爲洋人攫去不及釐金之權皆在華官答曰稅務司雖有估價驗貨之權而各關監督皆有官銀號無論華洋商稅皆持關單自向銀號完納卽歸海關監督收用故收銀用銀之權仍在監督而不在稅務司

或曰海疆有事恐關稅難收不如釐金與海疆不相干礙答曰庚申甲申甲午海口有事各國進口出口貨物照常納稅且交戰之國亦仍有他國代理未聞不收關

稅若至封口以致無稅可收其時亦斷無進出之釐金矣

或曰洋貨釐金一經併徵雖戶部總收之數大有所增而各省百貨釐金之內少去洋貨一宗收數不無減少疆吏以下能不羣起阻撓乎答曰當此籌餉艱難之際能徵進款百十萬已覺其難况增常年進款數百萬以上誠爲強弱緊要關鍵統籌全局應以天下之進款總數爲衡必權其輕重大小當不爲眾論所搖惑從前洋藥稅釐併徵之初除去洋藥釐金各省亦嘖有煩言幸朝廷堅持定見始能辦成每年多收數百萬現與赫德

熟商擬將向來出口土貨半稅全歸釐局徵收向來進口洋貨半稅全歸新關徵收大約歷年收數洋貨四成土貨六成從此各省全得六成土貨之釐金雖少去四成洋貨之釐金可無藉口矣

稅釐互勘請俟覈辦時分析詳陳片

光緒二十六年二月蘇藩聶會奏

再查洋貨沿途釐金未有半稅可抵稅釐併徵以後所短只有落地釐捐常年收數戶部有冊可稽開辦後總於籌餉有濟至稅釐互勘款目繁雜情形曲折有非筆墨所能賅備者臣等奉派後鉤稽數月於此中得失尙能具悉源流將來王大臣覈辦之時如有未盡深悉之處應由臣等逐端分析詳密面陳理合附片陳明伏乞聖鑒謹

奏 本日奉

硃批另有旨欽此

遵 旨會商開議加稅情形摺

光緒二十六年四月  
蘇藩聶會奏

奏爲據實覆陳仰祈

聖鑒事竊

臣

等於光緒二十六年二月二十四日承准

軍機大臣字寄本日奉

上諭盛宣懷等奏遵旨籌議增稅事宜並酌擬稅釐兼  
顧辦法一摺現在金貴銀賤較之咸豐十年初定稅則  
之時不啻倍蓰該京卿等於照時價另行覈估一節並  
未詳悉議及第籌議進口洋貨稅釐併徵併擬將出口  
土貨向完半稅者改完釐金以抵虧釐之數如與各省  
內地釐金毫無窒礙卽責成盛宣懷聶緝棗認定宗旨

次第開議然亦必確有把握方可改章儼因此別滋流弊轉致釐金大絀或統計所入得不償失事關餉項大局務當慎之又慎設有貽誤恐該京卿等不能當此重咎等因欽此臣等當與赫德迭次會商卽據詳細查明內有出口復進口土貨均係銀本如再增稅恐土貨銷路頓滯進口洋藥已經加稅船鈔無從另估故只能就金鎊所置之洋貨稅六百數十萬約可估增三百萬以內尙須除去茶葉估價約減二百萬所增甚微又煙酒等物免稅貨至多議增百萬然係束節只能附入大宗核辦倘能將洋貨加倍徵收則原有正稅加多固不待

言卽估價增稅煙酒等項納稅亦因之而倍收均歸值  
百抽十五之數合而計之方能於餉項大獲利益夫以  
十年一修稅則恐一議以後不能復議臣等責有攸歸  
不敢不統計得失認定宗旨故會同赫德擬訂開議節  
畧一擬進口貨估價後凡洋貨於進口時應將正稅及  
子口稅一併加倍完納一擬出口貨估價後凡土貨執  
有運照者一律抽釐領回收據仍符土貨往外國正子  
兩稅值百抽七五之例一擬免稅貨除實係西人自用  
外均照加倍之例議徵列爲三條正擬定期開議又於  
三月二十六日欽奉

上諭戶部總理各國事務衙門奏遵議盛宣懷等覆陳  
增稅事宜各摺片該京卿等所擬將進出口貨物照時  
價另行核估暨外國煙酒等物分別納稅均屬有利無  
害現在修約屆期卽著盛宣懷聶緝槩會同赫德照會  
各國公使將此項修改稅則緣由聲明大旨卽就以上  
兩端先行開議以免延誤至該京卿等所議釐稅併徵  
係專指洋貨而言與土貨釐金尙無關涉此中利害出  
入關繫甚大如果確有把握則每年可增千百餘萬之  
進款於大局實有裨益亦不宜諉延觀望致失事機所  
有洋貨加稅免釐一事著南北洋大臣兩廣湖廣四川



閩浙各總督江蘇安徽江西浙江山東湖北湖南廣東  
廣西各巡撫查照妥爲籌定限於一箇月內迅速覆奏  
聽候諭旨遵行等因欽此臣等覆查原擬節畧三條內  
進出口貨扯平估價及免稅貨分別納稅現奉

諭旨先行開議自應欽遵辦理據赫德聲稱此係初次  
交送外國條款將來卽爲開辦宗旨前擬籌餉大宗以  
加倍徵收爲最要若不將最要之事一起與議以後卽  
難再有添索之款臣等籌思再四不敢不據實上陳竊  
維戶部總理各國事務衙門原奏釐稅併徵一事請

飭各省督撫查覆係爲慎重防弊起見又恐覆奏未能

迅速是以請

旨飭令

臣

等先行開議兩端以免延誤修約期限現在

臣等與赫德會同斟酌條約所載稅則原有十年爲限

如欲酌修更改須於六箇月之前先行知照等語上年

總理各國事務衙門已經兩次照會英使目前應由

臣

等再與該使聲明期限係在本年九月卽將前給照會

作爲知照日期俟各省督撫覆奏到日聽候核定再與

英使訂期一起開議不致有誤限期所有遵奉迭次

諭旨會商開議情形理合繕摺覆陳伏乞

皇太后

皇上聖鑒謹

奏本日奉

硃批知道了欽此

密陳統計餉項得失並洋貨加稅抵撥洋款片

光緒二十六年

四月 蘇藩聶會奏

再查海關洋稅自光緒十三年起年勝一年二十四年徵收二千二百五十萬有奇二十五年徵收二千六百六十一萬有奇是洋貨土貨行銷日旺關稅日增已可概見

國家多事需餉甚亟若不迅速預籌常年大宗鉅款恐數年後爲難情形更有甚於今日者矣查洋貨稅釐併徵利害得失總以關稅增收之數與釐金減收之數兩相比較能否增益鉅款爲斷現蒙

飭下通商各省詳細查覆在疆臣受

恩深重諒必能查明向來洋貨釐金數目據實上陳并不難卽自本年正月爲始將該省實收洋貨釐金數目專案奏咨以資比較似非空言所能塞責夫洋貨釐金歸關併徵

國家歲增鉅款誠如

諭旨不宜諉延觀望致失事機

臣

等前擬辦法目下尙

未開辦旣不能見諸實事而摺內又未便將實可徵收之數詳細敘明在廷諸臣慎重度支大計宜其一再論列也至洋貨併徵之後究於餉項如何有益姑不具論

今擬先請認籌一款以證前言現與赫德籌商每年應還英德銀行借款奏准在七處釐金內認還五百萬兩原訂合同應由總稅務司派員代徵倘能辦成併徵則此項卽可改歸加稅項下撥還所有原認七處釐金無庸總稅務司代徵既可騰出鉅款又省許多周折若除還洋款五百萬兩外比較上年洋稅再增若干均候部撥赫德聲稱必可照辦臣等於二月二十四日面承訓示責令盡心竭力辦成此事不敢不悉心籌畫直摺所見以期仰副

宸厪於萬一所有遵

愚齋存藁

卷四

三

旨統計餉項得失大局情形理合附片密陳謹

奏 本日奉

硃批知道了欽此

陳明前往上海考察貨物時價情形片

光緒二十六年四月 蘇藩臬

會奏

再修改稅則辦法已奉

飭令將稅釐併徵一事交各省督撫妥籌速覆當與赫德會商擬俟覆奏到後一起開議已由

臣

等據實上陳

諒邀

聖明洞鑒約計各省覆奏到齊尙需時日原擬進出口貨物照時價覈估一端本須就上海商務薈萃之區會商增減

臣

等擬趁此無事之際前往預爲考察藉資將來印證一俟各督撫奏覆奉



旨飭議臣等接電後卽行來京欽遵籌辦理合附片陳明謹

奏本日奉

硃批著照所請欽此

愚齋存彙卷第四